

552

蔣尊簋爲招商局問題告各界電



上海图书馆藏书



A541 212 0017 4437B



# 蔣尊簋爲招商局問題告各界電

南京中央黨部國民政府各院各部各政治分會勛鑒各報館轉各省黨部各商會各法團暨全國同胞公鑒近以招商局問題受股東之付托本良心之主張毅然訴諸公理以俟國人之裁判者決非有私意存乎其間也夫招商局爲完全商股商辦公司政府本無越俎代庖之理宣言具在成案猶存乃自派員清查以至接收管理宗旨屢變辦法兩歧實非股東始料所及交通部爲監督機關而對於股東之請求開會則謂該局問題政府正在妥籌辦法該股東等安心靜候毋庸自相驚擾等語誠不解交部籌畫至一年餘而尙以正在籌劃爲辭吾恐股東再靜候若干時必至破產而無疑


尊簋亦政府清查委員之一以從前政府宣言與現時當局辦法相比

較前後矛盾殊關威信上海爲中外觀瞻所繫爲一公司而隳政府無上之威信淪商局於萬劫不復權衡輕重未免失策此爲維持政府威信計不得不出一言而告者一也 先總理民生主義注重實業救國航業爲實業要圖自招商局有收管之榜樣而國內之熱心企業者無不相顧失色挈家而去香港走大連者挈資而投租界存外國銀行者實大有其人爲淵驅魚爲叢驅雀爲一區區四千萬之招商局而斷絕無量數之實業得失何待著蔡況實業衰落商市益見荒涼專家既無所施其技能工人更無所用其勞力強者挺而走險弱者溝瀆自經謂非與實業救國之道大相逕庭乎此爲實現民生主義計不得不出一言而告者二也 招商局自監督處委派趙鐵橋爲總辦實行接管以來舉凡局中會計用人行政法制諸大端多未按章經過董事會議決而逕自施行如總局分局各棧各輪購

置修繕並一切收支百計把持不許董事會暨股東等直接查詢其尤駭聽聞者莫如擅租劉某之華陽輪船抵押金利源一帶房屋明知虧累而不顧又如擅自更換總務會計船務出納會計各正副科長天津漢口廣東香港汕頭營口寧波溫州南京安慶各分局正副局長上海浦東各棧長及各輪船業務主任而其所引用者多未悉商局情形亦罕有航業知識並在分局則巧立幫辦名目在總局則巧立顧問參議視察名目均爲局制所無月薪數百元不等此外船期延誤則損失不貲修船遲滯則貽誤營業借債還債漫相誇飾非特自欺欺人抑亦蒙蔽政府他如江新之販鹽江安之販土鍾案新濟之浩劫新康江靖之撞船圖南江新之損壞以數月之時間竟事變之迭出中外各航業公司不聞有此卽從前商局亦無如是疎虞誰爲主管誰執其咎至於該局內容如果無他何

必深閉固拒不肯公開迨商情忿激而始以片面之電詞塗飾耳目天下豈有不許股東過問而自議決自執行自報賬目自誇成績者乎此爲整頓實業前途計不得不一言而告者三也 言論自由本黨素所主張亦世界各國之公例况係股東呼籲尤職責上所應盡而趙則千方箝制致函滬上各機關禁止各報登載招商局股東方面之文件而諱莫如深是誠何居心而出此明眼人當自顯然夫趙以實業公司董事會聘任之職員而可致書軍警各署禁止言論自由是直周王之防民口秦帝之禁偶語復見於今日也是可爲孰不可爲 此爲主張言論自由計不得不出一言而告者四也 上海爲輿論集中之點是非本有定評自社會惕於環境如總商會華僑聯合會之能據理力爭主張公道者幾如景星慶雲 尊簋爲國民一分子無論在野在朝良心上均有相當之責任况追隨我 先總理

者二十餘載自應本其大公無我之精神爲民衆謀樂利爲國家留  
元氣卽爲先總理貫澈其主張商局雖小而關於國計民生者  
實鉅非對人問題而有所愛憎也兩問公道究不可泯區區此心尙祈鑒  
之 蔣尊簋叩佳



上海图书馆藏书



A541 212 0017 4437B





657

